

naaraa purkhoN kaa

Aryabhata ne surya prithvi ke sambandho.n ko darshaayaa
Bhaskaracharya kee gaNit sa.nhitaa ko duniyaa ne apnaayaa
kooTneeti aur raajneeti mei.n *Kautilya* sabse aage
Kalhan ke itihaaso.n se soye hue ateet jaage
Charak rishi kee aushadhiyo.n se swasth rahe hardam tanman
Panini ke sootro.n ke bal par bhaaShaa.n ka huaa srijan
in purkho.n ke ho.nTho.n par upajaa thaa naara 'Jai Vigyaan'
duniyaa ke vikasit desho.n mei.n, khaRaa thaa Bhaarat seenaa taan

Bhaarat ke is swarNim yug kaa bhee samay antim aayaa
naalanda ka huaa vinaash, agyaan ka sannaaTaa chhaayaa
aaye raajaa paNDit aadi, mahaarathee laakho.n sainik
shataabdiyaa.n par beet gayee.n, na janmaa koi vaigyaanik
pichhaD gaye, ho gayaa patan, Dheh gaye ve saare budhhi ke dhaam
kohre mei.n khoye Bhaarat ko, videshiyo.n ne kiyaa Gulaam
dhanvaano.n mei.n thee ginatee, ab daridrataa ka thaa apmaan
ban gaye ham baazaar vishwa kaa, bechte sirf kachaa saamaan

naye uday mei.n *Vishweshwar* ne sa.nwaare kisaano.n ke jeevan
Swaminathan kee harit kraanti se huaa raaShtra khaadya sampann
C. V. Raman ke pareekshaNo.n ne kiraNo.n par prakaash Daalaa
Bose Acharya ne radio ka kiyaa aaviShkaar niraalaa
Chandrashekhar kee seemaa ke andar rahe brahmaa.nD apaar
Hargobind kee chikitsaao.n par, sadaa rahe jag kaa aabhaar
kaThin dino.n mei.n in rishiyo.n ne, jamkar liyaa thaa ab yeh Thaan
desh bane bha.nDaar gyaan ka, lei.n ham bhee Nobel sammaan

raaShTra huaa swatantra, vikaas ke raah khaRee thee.n baadhaaye.n
Shanti Bhatnagar ne anusandhaan hetu banayee.n sansthaaye.n
lauT aaye *Bhabha* videsh se, parmaanNu kee dee shakti
Ramanna Chidambaram aadi ne kaarya ko dee poorna bhakti
Sarabhai ne dekhaa sapnaa antariksh dwaaraa pragati
Dhawan, Kalam, Brahm Prakash ne sapne ko dee aakriti
vikaasasheel is desh ke andar, nahee.n the yeh kaarya aasaan
lekin un mei.n yeh jwaalaa thee, nayaa rache.nge Hindustaan

Computer sanchaar kaal hai, yeh hamaara hai avasar
rok nahee.n sakta koe, har kaarya mei.n ham uttamtar
chandramaa par lehraaye tira.ngaa, yeh sapnaa hogaa saakaar
ma.ngal budh bhee door nahee.n hai.n, ab maane.nge ham naa haar
in sapno.n ke beech na bhoolei.n, chalnaa hai, manzil hai door
kaThinaaiyaa.n aaye.ngee, milkar muqaabla karei.nge huzoor
Eeshwar se bas ek nivedan, is '*Vidyarthi*' ka armaan
phir se kabhee na bhoolei.n ham, naaraa purkho.n kaa 'Jai Vigyaan'

Sridhar Narayanan '*Vidyarthi*'